



REPUBLIKA E KOSOVËS - REPUBLIKA KOSOVA - REPUBLIC OF KOSOVO
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL
PANELI ZGJEDHOR PËR ANKESA DHE PARASHTRESA
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

ZL.Anr.334/2025

PANELI ZGJEDHOR PËR ANKESA DHE PARASHTRESA (PZAP), i përbërë nga gjyqtarët: Violeta Husaj Rugova-kryesuese, Hajriz Hoti dhe Bujar Muzaqi anëtarë, duke vendosur përkitazi me ankesën e Suliot Lluka, kandidat për anëtarë të kuvendit komunal në Komunën e Suharekës, nga radhët e Subjektit Politik Partia Demokratike e Kosovës(PDK), të paraqitur kundër Komisionit Qendror të Zgjedhjeve – KQZ, për shkak të parregullsive gjatë numërimit në Qendrën Komunale të Numërimit (QKN) në Gjakovë, për Zgjedhjet Lokale, të mbajtura më datë 12 Tetor 2025, në seancën e panelit të mbajtur me 25.10.2025, merr këtë:

V E N D I M

HEDHET E PASAFATSHME ankesa ZL.Anr.334/2025, datë 24.10.2025, e parashtruar nga kandidati për anëtar të kuvendit komunal në Komunën e Gjakovës, Suliot Lluka nga radhët e Subjektit Politik Partia Demokratike e Kosovës (PDK) të paraqitur kundër Komisionit Qendror të Zgjedhjeve – KQZ, për shkak të parregullsive gjatë numërimit në Qendrën Komunale të Numërimit (QKN) në Gjakovë, për Zgjedhjet Lokale, të mbajtura më datë 12 Tetor 2025.

A r s y e t i m

Me datë 24.10.2025, PZAP-i, ka pranuar ankesë nga Suliot Lluka, kandidatit për anëtar të kuvendit komunal në Komunën e Gjakovës nga radhët e Subjektit Politik Partia, e dorëzuar në Postën e Kosovës me datën 21.10.2025, me të cilën pretendon se ka dyshime në lidhje me mospërputhje ndërmjet numrit real të votuesve dhe rezultatit të numërimit në disa vendvotime në Gjakovë. Tutje, parashtruesi i ankesës ka përmendur në ankesë shkollën “Fehmi Agani” 0204 ku ankuesi thekson sipas listës së mbajtur nga ai, 127 persona ja kanë premtuar votën, ndërsa 57 mungojnë, në shkollën e “Korenicës 0215” mungojnë dy vota, në shkollën “Yll Morina 0203” ka raste të votuesve të identifikuar që nuk janë reflektuar si votues, shkollën “Mustafa Bakija 0202” ka raste të votuesve të identifikuar që nuk janë regjistruar në procesverbalet përfundimtare, shkolla e “Nexhbedin Nixha 0205” ka raste të votuesve që nuk janë reflektuar në rezultatet përfundimtare. Andaj, parashtruesi i ankesës kërkon rishikim dhe rinumërim të votave në të gjitha vendvotimet e përmendura dhe krahasimi në procesverbal origjinal.

Në përgjigjen në ankesë të Komisionin Qendror të Zgjedhjeve – KQZ, sqaron se bazuar në nenin 101 të Ligjit Nr. 08/L-228 për Zgjedhjet e Përgjithshme në Republikën e Kosovës (LZP),

Rregulloren Zgjedhore Nr. 16/2024, Qendrat Komunale të Numërimit (QKN), Procedura e Veprimit në Qendrën Komunale të Numërimit për Zgjedhjet Lokale 2025, e miratuar më 01.10.2025, Nr.01/2601/2025, përcaktohet procedura e detajuar lidhur me procesin e numërimit në QKN. Rezultatet preliminare nga vendvotimet mund korrigjohen në Qendrën Komunale të Numërimit, në përputhje me paragrafin 3 të nenit 14 të Rregullores Zgjedhore Nr. 16/2024 për Qendrat Komunale të Numërimit (QKN). Rezultatet përfundimtare të procesit zgjedhor, shpallën nga KQZ-ja pas përfundimit të numërimit të të gjitha fletëvotimeve nga vendvotimet e rregullta; fletëvotimeve nga votimi me kusht; fletëvotimet nga votimi i personave me nevoja të veçanta; fletëvotimeve nga votimi jashtë Kosovës; vendosjes për ankesat eventuale nga PZAP dhe Gjykata Supreme dhe pas përfundimit të gjitha procedurave në QNR, ku rezultati i publikuar është i ankimeshëm nga subjekte politike dhe kandidatët të cilët kanë pretendime në raport me numërimin e votave të tyre. Pra, në momentin e publikimit të rezultateve përfundimtare nga KQZ-ja, palët e pakënaqura në pajtim me nenin 105 të LZP, mund të ushtrojë ankesë në afatin brenda dyzet e tetë (48) orëve në PZAP.

Andaj pas analizimit të lëndës është vërejtur se pala ankuese ankesën e ka paraqitur jashtë afatit ligjor për paraqitjen e ankesës, sepse pas konfirmimit të ZEKKZ në komunën e Gjakovës, aktiviteti i QKN-së është përmbyllur me datën 17.10.2025, ditën e premte në ora 13:30 ndërsa ankesa është parashtruar me datën 24.10.2025. Pra nuk është brenda afatit ashtu siç parashihet me nenin 105, par.1 të LZP. Ankesat lidhur me administrimin e numërimit në QKN dhe QNR, dorëzohen me shkrim pranë PZAP-së brenda dyzet e tetë (48) orëve nga ndodhja e shkeljes se supozuar.

Sa i përket pretendimeve të palëve ankuese që mbështeten në deklaratimet e personave duhet theksuar se, në kuptim të nenit 4 paragrafi 1.3 të LZP-së, liria dhe fshehtësia e votës janë të garantuara. Publikimi i votës cenon këtë parim dhe shpërfaq vullnetin e votuesit. Në kuptim të nenit 117 paragrafi 3 të LZP, gjatë shqyrtimit të ankesës është vërejtur se palët ankuese, nuk ka bashkangjitur prova të mjaftueshme që do të mund të dëshmonin apo mbështesnin pretendimet e saj të paraqitura në ankesë. Gjithashtu, ju njoftojmë se i gjithë materiali zgjedhor duke përfshirë edhe kamerat e sigurisë, pas përfundimit të gjithë procesit të punës së QKN i njëjti material zgjedhor dorëzohet nga QKN në Qendrën e Numërimit dhe Rezultateve-QNR dhe të njëjtat mund të verifikohen dhe hetohen nga PZAP dhe organet e drejtësisë.

Paneli Zgjedhor për Ankesa dhe Parashtresa - PZAP, pas shqyrtimit të ankesës dhe shkresave të lëndës konstaton se:

- Ankesa është e pasafatshme

Në këtë rast, PZAP nga shqyrtimi i shkresave të lëndës, ankesës se ankuesit, përgjigjen në ankesë të KQZ-se konstatohet se parashtruesi i ankesës ka dorëzuar ankesën me datë 21.10.2025 në postë, ku ka pretenduar se ka pasur parregullsi në numërim të votave, ndërsa sipas përgjigje nga KQZ dhe Provave të Bashkangjitura procesi i numërimit në Qendër Komunale është përmbyllur me datë 17.10.2025 në ora 13:30, ditën e premte.

Me dispozitën e nenit 105 paragrafi 1, në mënyrë decitive parashihet se *"Ankesat lidhur me administrimin e numërimit në QKN dhe QNR, dorëzohen me shkrim pranë PZAP-së brenda dyzet e tetë (48) orëve nga ndodhja e shkeljes së supozuar," të Ligjit Nr. 08/L-228 për Zgjedhjet e Përgjithshme në Republikën e Kosovës. Nga kjo kuptohet se ankesa është dorëzuar pas afatit të paraparë ligjor.*

Me dispozitën e nenit 9 paragrafi 5 të Rregullores Nr. 01/2025 për Procedurat e Parashtrimit dhe Vendosjes së Ankesave të PZAP-it, parashihet që *"Personi mund të paraqes ankesë në PZAP, brenda dyzet e tetë (48) orëve për shkeljet e pretenduara",* ndërsa nën paragrafi 5.16. parashihet që *"Për shkeljet e pretenduara gjatë procesit të administrimit dhe numërimit në QKN dhe QNR".*

Neni 13, paragrafi 3, nën paragrafi 3.2 i Rregullores Nr.01/2025 për Procedurat e Parashtrimit dhe Vendosjes së Ankesave të PZAP-it, parasheh që: *"PZAP-i e hedhë ankesën kur vlerëson se ajo nuk është dorëzuar në afatin e paraparë ligjor."*

PZAP Konstaton se nga përgjigja e KQZ është vërtetuar se aktiviteti i QKN-së në Komunën e Gjakovë, është përmbyllur më datë 17.10.2025, në ora 13:30, ditën e premte, me çka vërtetohet se ankesa e ankuesit nuk është paraqitur brenda afatit ligjor prej 48 orëve siç parashihet me nenin 105, paragrafi 1 të Ligjit për Zgjedhjet e Përgjithshme në Republikën e Kosovës.

Paneli, ka gjetur se ankesa e parashtruar nga kandidati për anëtar të kuvendit komunal në Komunën e Gjakovës Suliot Lluca, nga radhët e subjektit politik Partia Demokratike e Kosovës (PDK), për shkak të parregullsive në numërim të votave, është parashtruar pas afatit ligjor të përcaktuara me dispozitat e lartë cekuar, andaj PZAP vendosi që ankesa e ankuesit të hedhet si e pasafatshme.

Nga arsyet e theksuara më lartë dhe duke u bazuar në nenin 105 paragraf 1 të Ligjit Nr.08/L-228 Për Zgjedhjet e Përgjithshme në Republikën e Kosovës lidhur me nenin 9 paragrafi 5, nenin 13, paragrafi 2, neni 13 paragrafi 3 nën paragrafi 3.2 të Rregullës 01/2025 për Procedurat e Parashtrimit dhe Vendosjes së Ankesave, paneli vendosi si në dispozitiv të këtij vendimi.

PANELI ZGJEDHOR PËR ANKESA DHE PARASHTRESA

ZL.Anr.334/2025, datë 25.10.2025

Kryesuese e Panelit

Violeta Husaj Rugova



KËSHILLA JURIDIKE: Kundër këtij vendimi është e lejuar ankesa sipas nenit 118 paragrafi 4 të LZP-së, në Gjykatën Supreme të Kosovës, brenda dyzet e tetë (48) orëve nga momenti i marrjes-pranimi të këtij vendimi.